



**eKAB-Nr.:** 00.125.878

**Stelle:** Regierung Graubünden

**Rubrik:** Kantonale amtliche Publikationen / Inkrafttreten

**Veröffentlicht:** 17.04.2025

## Lescha davart las scolas popularas dal chantun Grischun (Lescha da scola)

Il text da la revisiun parziala da la Lescha davart las scolas popularas dal chantun Grischun (Lescha da scola) dals 5 da december 2024 è vegnì publicà ils 11 da december 2024 en il Fegl uffizial chantunal (eFUC nr. 00.116.545). Questa revisiun sottasteva al referendum facultativ.

Il termin da referendum è scadì ils 11 da mars 2025. Entaifer quest termin n'èn vegnids inoltrads nagins referendums. Perquai ha la Regenza concludì ils 15 d'avrigl 2025 da metter en vigur la revisiun parziala da la Lescha davart las scolas popularas dal chantun Grischun (Lescha da scola) dals 5 da december 2024 per il 1. d'avust 2025.

En num da la Regenza

Il president: Marcus Caduff

Il chancelier: Daniel Spadin



eKAB-Nr.: 00.116.545

Stelle: Grosser Rat Graubünden

Rubrik: Kantonale amtliche Publikationen / Fakultative Referenden

Veröffentlicht: 11.12.2024

# Lescha davart las scolas popularas dal chantun Grischun (Lescha da scola)

## Referendum facultativ

Scadenza dal termin per il referendum: 11 da mars 2025

## Lescha davart las scolas popularas dal chantun Grischun (Lescha da scola)

Midada dals 05-12-2024

Relaschs tangads da questa fatschenta (numers dal DG)

Nov:	–
Midà:	<b>421.000</b>
Aboli:	–

Il Cussegl grond dal chantun Grischun,

sa basond sin l'art. 31 al. 1 e sin l'art. 89 al. 2 da la Constituziun chantunala,

sunter avoir gì invista da la missiva da la Regenza dals 27 d'avust 2024,

concluda:

I.

Il relasch "Lescha davart las scolas popularas dal chantun Grischun (lescha da scola)" DG **421.000** (versiun dals 01-01-2025) vegn midà sco suonda:



## Titel (midà)

Lescha davart las scolas popularas dal chantun Grischun (Lescha davart las scolas popularas, LSP)

## Art. 7 al. 3 (aboli)

<sup>3</sup> *aboli*

## Art. 10 al. 2 (midà)

<sup>2</sup> La frequentaziun da la scola è obligatorica sin il stgalim da scolina, sin il stgalim primar e sin il stgalim secundar I.

## Art. 12 al. 1 (midà)

<sup>1</sup> Uffants che han cumplenì il 5avel onn da vegliadetgna fin ils 31 da december, entran en il stgalim da scolina cun il cumenzament da l'onn da scola dal medem onn chalendar.

## Art. 13 al. 1 (midà), al. 2 (midà)

<sup>1</sup> L'obligaziun d'ir a scola cumpiglia per regla 11 onns da scola. Scholaras e scholars che absolvan pli svelt l'instrucziun conform al plan d'instrucziun da la scola populara, vegnan relaschads pli baud da l'obligaziun d'ir a scola.

<sup>2</sup> Sche l'obligaziun d'ir a scola dad 11 onns è ademplida u sche la scola populara è vegnida absolvida pli svelt, finescha il dretg da frequentar la scola populara.

## Titel suenter Art. 15 (midà)

3.3. Scolas privatas, instrucziun privata e scolas en ils ospitals

## Art. 19a (nov)

Scolas en ils ospitals, incarica da prestaziun e finanziaziun



<sup>1</sup> Il departament designescha ils ospitals e las clinicas che pon porscher instrucziun per scolaras e scolars. El po conceder a tals e talas ina incarica da prestaziun per manar ina scola en l'ospital.

<sup>2</sup> Las instituziuns ch'èn responsablas per la scola sa participeschan cun ina pauschala annuala per scolara u scolar als custs da las scolas en ils ospitals. La pauschala vegn calculada sin fundament dals custs effectivs imputabels da las scolas en ils ospitals per las scolaras ed ils scolars.

<sup>3</sup> Il chantun surpiglia maximalmain ils custs restants ch'èn imputabels mintga onn.

#### **Art. 23 al. 1 (midà)**

<sup>1</sup> Las scolaras ed ils scolars dal stgalim da scolina, dal stgalim primar e dal stgalim secundar I vegnan attribuids ad ina classa.

#### **Art. 25 al. 2 (midà), al. 3 (midà)**

<sup>2</sup> Las unitads d' instrucziun duran 45 minutas sin il stgalim da scolina, sin il stgalim primar e sin il stgalim secundar I.

<sup>3</sup> En cas motivads po l'uffizi permetter excepziuns.

#### **Art. 26 al. 2 (midà)**

<sup>2</sup> Sin il stgalim da scolina e sin il stgalim primar importan las uras da bloc almain quatter lecziuns consecutivas.

#### **Art. 27 al. 3 (midà)**

<sup>3</sup> La Lescha davart la promoziun da la tgira d'uffants complementara a la famiglia en il chantun Grischun vegn applitgada conform al senn per purschidas en il rom da las structures dal di supplementaras tenor la legislaziun davart las scolas popularas.



### **Art. 39 al. 2 (midà)**

<sup>2</sup> La Regenza fixescha las prestaziuns che ston vegnir furnidas da las instituziuns ch'èn responsablas per la scola. Per la scolaziun d'uffants da personas ch'èn admessas provisoricamain, da requirentas e da requirents d'asil ubain da viagiantas e da viagiants po ella prender mesiras che divergeschan da las disposiziuns da la Lescha davart las scolas popularas.

### **Art. 46 al. 1 (midà), al. 2 (midà), al. 3 (midà)**

<sup>1</sup> Las mesiras simplas e las mesiras pretensiusas da la pedagogia speziala vegnan realisadas – tut tenor basegn – en furmas da scolaziun e da promoziun integrativas, parzialmain integrativas e separativas.

<sup>2</sup> Las mesiras pretensiusas da la pedagogia speziala vegnan realisadas en moda integrativa, sche la scolaziun e la promoziun en la classa regulara han avantatgs per la scolara u il scolar che ha in basegn spezial da promoziun e sche quai è supportabel per la classa regulara.

<sup>3</sup> Cas cuntrari vegnan las mesiras pretensiusas da la pedagogia speziala realisadas en moda parzialmain integrativa sco instrucziun da gruppa u sco instrucziun individuala ubain en moda separativa en partiziuns d'instituziuns da la scolaziun speziala u en famiglias.

### **Art. 53 al. 1**

<sup>1</sup> Las scholaras ed ils scholars han il dretg sin:

- b) **(midà)** respect e rinforz da lur personalitad;
- c) **(nov)** audiziun en ils fatgs da scola che pertutgan ellas sezzas ed els sezs.

### **Art. 57 al. 1 (midà)**

<sup>1</sup> Las personas d'instrucziun ston avair in diplom reconuschì che corresponda al stgalim u ina scolaziun ch'è vegnida reconuschida da la Regenza respectivamain ina permissiun da dar scola ch'è vegnida concedida da l'uffizi.



### **Art. 62 al. 1, al. 2 (midà), al. 3 (midà)**

<sup>1</sup> Per in pensum cumplain sto vegnir prestà il suandant dumber d'unitads d'instrucziun per emna:

a) **(midà)** stgalim da scolina: 29 lecziuns

<sup>2</sup> Il pensum d'ina persuna d'instrucziun da classa dal stgalim da scolina, dal stgalim primar e dal stgalim secundar I vegn reducì per 1 lecziun per emna da scola.

<sup>3</sup> Las persunas d'instrucziun cun in pensum da 65 pertschient u dapli han il dretg sin ina facilitaziun da vegliadetgna a partir dal 55avel onn da vegliadetgna.

### **Art. 64 al. 2 (midà)**

<sup>2</sup> En cas da persunas d'instrucziun che han instruì durant almain 10 onns e cun in pensum d'almain 20 lecziuns per emna sin il stgalim da scolina, sin il stgalim primar u sin il stgalim secundar I, sa participescha il chantun ina giada vi dals custs d'in congedi da furmaziun supplementara da maximalmain 3 mais.

### **Art. 66 al. 1 (midà), al. 2 (midà)**

<sup>1</sup> Per las persunas d'instrucziun da la scola populara publica valan en cas d'in pensum cumplain tenor l'artitgel 62 las suandantas tariffas minimalas da salarisaziun (inclusiv il 13avel salari mensil):

Emprim stgalim da salari

a) **(midà)** stgalim da scolina e stgalim primar:

1. **(midà)** persunas d'instrucziun da la scolina, persunas d'instrucziun da la scola primara e persunas d'instrucziun spezialisadas: fr. 78 000.–
2. **(nov)** persunas d'instrucziun che han in diplom en pedagogia speziala: fr. 85 000.–

b) *aboli*

c) stgalim secundar I:

1. **(midà)** persunas d'instrucziun da la scola reala e da la scola secundara che han in diplom en pedagogia speziala: fr. 94 600.–
2. **(midà)** persunas d'instrucziun spezialisadas cun in u cun dapli che in rom respectivamain cun in u cun dapli che in sectur spezial: fr. 90 600.–



<sup>2</sup> La salarisaziun minimala per il stgalim da salari il pli aut importa 153 pertschient da la tariffa da l'emprim stgalim da salari.

### **Art. 72 al. 2**

<sup>2</sup> Las pauschalas importan:

- |    |   |            |
|----|---|------------|
| a) | (midà) per il stgalim da scolina e per il stgalim primar: | fr. 1266.– |
| b) | per il stgalim secundar I:                                |            |
| 1. | (midà) scola reala:                                       | fr. 1900.– |
| 2. | (midà) scola secundara:                                   | fr. 1820.– |

### **Art. 88a (nov)**

Contribuziuns pauschalas a champs da classa, ad emnas da project ed ad excursiuns

<sup>1</sup> Cun contribuziuns pauschalas a las instituziuns ch'èn responsablas per la scola promova il chantun la realisaziun da champs da classa da plirs dis, d'emnas da project e d'excursiuns cun pernottaziuns externas durant las emnas da scola.

<sup>2</sup> La contribuziun chantunala importa 20 francs per scolara u scolar e per di realisà cun pernottaziun externa.

<sup>3</sup> La contribuziun pauschala chantunala maximala per classa e per champ, per emna da project u per excursiun importa 1500 francs per onn da scola.

<sup>4</sup> La Regenza po adattar questa contribuziun a la chareschia.

## **II.**

Naginas midadas en auters relaschs.

## **III.**

Naginas aboliziuns d'auters relaschs.



#### IV.

Questa revisiun parziala è suttamessa al referendum facultativ.  
La Regenza fixescha il termin da l'entrada en vigur.

En num dal Cussegl grond:  
La presidenta: *Silvia Hofmann*  
Il chancelier: *Daniel Spadin*

Data da publicaziun: 11 da december 2024  
Scadenza dal termin per il referendum: 11 da mars 2025